

Dr. Edward Cheung ta presidente di conferencia Green Aruba 2015

ORANJESTAD - Dr. Edward Cheung, kende ta un científico na NASA y a haci contribucionnan remarcabel na e progreso di Aruba, ta un biaha mas e presidente di conferencia Green Aruba. Na National Aeronautics and Space Administration (NASA), actualmente dr. Cheung ta e ingeniero principal pa e "Satellite Servicing Program".

For di e prome Green Aruba conference na 2010, unda cu dr. Edward Cheung a participa como un orador, el a demostra su apoyo pa e trayectorio cu Aruba tabata embarcando ariba pa haci di e isla un pais mas sostenibel den uzo di energia. Ademas, por a wak e científico durante di Green Aruba y caba den intercambionan entusiasma

cu muchanan y hobennan, kende semper e ta curasha y inspira pa sigui desaroya nan talentonan y habilidad, y realisa nan deseo di un estudio avansa.

Cheung a gradua pa su doctorado den "Electrical Engineering and Robotics" for di universidad di Yale y a cuminsa traha na NASA Goddard Space Flight Center na 1991. Den transcurso di añanan el a traha riba diferente sub sistema di e Hubble Space Telescope.

Entre otro el a traha riba e diseño electrónico di partinan di e sistema di coriente, e sistema pa fria cu ta traha cu e metodo "cryogenic", e mantencion di e "Advanced Camera for Surveys", y e diseño di e Wide Field Camera 3". Actualmente e Wide Field Camera 3 ta e camara científic-



co principal di e Hubble. Mas recientemente el a diseñá y construi componentenan pa e International Space Station.

Dr. Edward Cheung a ricibi e reconocimiento "Exceptional Engineering Award" di NASA y a wordo nombra Ridder in de Orde van de Nederlandse Leeuw pa Reina Beatrix.

E conferencia anual Green Aruba a wordo funda na 2010 pa Gobierno di Aruba, Utilities Aruba NV, NV ELMAR, y WEB Aruba NV. E obhetivo específico pa cual a establece e plataforma Green Aruba ta pa discuti, explora, evalua y introduci procesonan y proyectonan den Aruba su transicion pa 100% independencia di recursonan fossiel pa produccion di awa potabel y energia. □